



ლაგოდეხის მუნიციპალიტეტის გამგებელი

ბრძანება

№ 2/1395

2015 წლის 28 ოქტომბერი

ქ.ლაგოდეხი

სამოქალაქო მრჩეველთა საბჭოს დებულების დამტკიცების თაობაზე

საქართველოს ორგანული კანონის „ადგილობრივი თვითმმართველობის კოდექსის“ 54-ე მუხლის პირველი პუნქტის ე.ე ქვეპუნქტის, 61-ე მუხლის მე-3 პუნქტის „ვ“ ქვეპუნქტის, 85-ე, 86-ე და 88-ე მუხლების, „ლაგოდეხის მუნიციპალიტეტის გამგეობის დებულების დამტკიცების შესახებ“ ლაგოდეხის მუნიციპალიტეტის საკრებულოს 2014 წლის 25 ივლისის N20 დადგენილების შესაბამისად

ვბრძანებ:

1. დამტკიცდეს მუნიციპალიტეტის გამგეობასთან არსებული საზოგადოებრივი საბჭოს დებულება დანართის სახით.
2. ბრძანება ძალაში შედის გამოქვეყნებისთანავე.
3. ბრძანების გასაჩივრება შესაძლებელია გაცნობიდან ერთი თვის განმავლობაში გურჯაანის რაიონულ სასამართლოში შემდეგ მისამართზე: ქ. გურჯაანი, სანაპიროს ქ. №22.

გამგებელი:



კარლო ჯამბურია

მუნიციპალიტეტის გამგეობასთან არსებული საზოგადოებრივი საბჭოს დებულება

ეს დებულება განსაზღვრავს მუნიციპალიტეტის გამგებლის სათათბირო ორგანოს სამოქალაქო მრჩეველთა საბჭოს (შემდგომში-საბჭო) უფლებამოსილებებს, მისი შექმნისა და საქმიანობის წესს;

თავი პირველი ზოგადი დებულებები

მუხლი 1. სამოქალაქო მრჩეველთა საბჭოს ცნება

საბჭო არის მუნიციპალიტეტის გამგებლის მუნიციპალიტეტის რაიონის გამგებლის სათათბირო ორგანო, რომელიც იქმნება ადგილობრივი თვითმმართველობის საქმიანობის გამჭვირვალობისა და თვითმმართველობის განხორციელებაში მოქალაქეთა მონაწილეობის ხელშეწყობის მიზნით.

მუხლი 2. საბჭოს საქმიანობის ძირითადი პრინციპები და მიზნები

1. საბჭოს პრინციპებია:

- ა) კანონიერება;
- ბ) თანასწორობა;
- გ) საჯაროობა;
- დ) მიუკერძოებლობა;
- ე) კოლეგიურობა;
- ვ) საჯარო და კერძო ინტერესების პროპორციულობა.

2. საბჭოს მიზანია:

- ა) ადგილობრივი თვითმმართველობის განხორციელებაში მოქალაქეთა მონაწილეობის უზრუნველყოფა;
- ბ) მუნიციპალიტეტის მაცხოვრებლებსა და გამგეობას შორის მჭიდრო ურთიერთკავშირის უზრუნველყოფა;
- გ) მუნიციპალიტეტის გამგეობის საქმიანობაზე საზოგადოებრივი მონიტორინგის განხორციელება;
- დ) მუნიციპალიტეტის გამგეობის საქმიანობის ეფექტურობის, ეფექტიანობისა და გამჭვირვალობის უზრუნველყოფა;
- ე) მოქალაქეთა ინტერესების წარმოდგენა და დაცვა მუნიციპალიტეტის გამგეობის საქმიანობაში.

მუხლი 3. საბჭოს საქმიანობის სამართლებრივი საფუძვლები

1. საბჭოს საქმიანობის სამართლებრივი საფუძვლებია: საქართველოს კონსტიტუცია, საქართველოს ორგანული კანონი „ადგილობრივი თვითმმართველობის კოდექსი“, სხვა საკანონმდებლო და კანონქვემდებარე აქტები და ეს დებულება;
2. საბჭოს საქმიანობასთან დაკავშირებულ საკითხებს რომლებიც არ არის მოწესრიგებული საქართველოს კანონმდებლობით და ამ დებულებით წყვეტს საბჭო.

მუხლი 4. საბჭოს სტრუქტურა და შემადგენლობა

1. საბჭოს შემადგენლობაში შედიან საბჭოს წევრები, საბჭოს თავმჯდომარე და მდივანი;
2. საბჭოს შემადგენლობას ამტკიცებს მუნიციპალიტეტის გამგებელი. საბჭოს შემადგენლობა განისაზღვრება არანაკლებ 10 წევრით;
3. საბჭოს შემადგენლობაში შედიან მეწარმე იურიდიული პირების, არასამეწარმეო არაკომერციული იურიდიული პირების და მუნიციპალიტეტის მოსახლეობის წარმომადგენლები;
4. საბჭოში ერთი სქესის წარმომადგენელთა რაოდენობა 1/3-ზე ნაკლები არ უნდა იყოს. საბჭო უფლებამოსილი არ არის თუ დარღვეულია ამ პუნქტის მოთხოვნა;
5. საბჭო უფლებამოსილია თავისი საქმიანობის წარმართვის და მისი ხელშეწყობის მიზნით საკუთარი შემადგენლობიდან აირჩიოს საბჭოს თავმჯდომარე (შემდგომში - თავმჯდომარე);
6. საბჭო უფლებამოსილია საბჭოს სხდომის ორგანიზების, სხდომის ოქმის შედგენის და გაფორმების და სხვა ორგანიზაციული ფუნქციების განსახორციელებლად აირჩიოს საბჭოს მდივანი (შემდგომში - მდივანი).

თავი მეორე

საბჭოს თავმჯდომარე და საბჭოს წევრი

მუხლი 5. საბჭოს თავმჯდომარე

1. საბჭო საკუთარი შემადგენლობიდან დამსწრეთა უმრავლესობით, ღია კენჭისყრით, 2 წლის ვადით ირჩევს საბჭოს თავმჯდომარეს;
2. საბჭოს თავმჯდომარე უძღვება საბჭოს სხდომებს, უზრუნველყოფს საბჭოს გადაწყვეტილების მუნიციპალიტეტის გამგებელისათვის წარდგენას და ახორციელებს ამ დებულებით გათვალისწინებულ სხვა უფლებამოსილებებს;
3. თავმჯდომარის არყოფნის შემთხვევაში თავმჯდომარის უფლებამოსილებებს მისივე დავალებით ახორციელებს საბჭოს ერთ-ერთი წევრი;
4. საბჭოს თავმჯდომარის საქმიანობა არ ანაზღაურდება.

მუხლი 6. საბჭოს თავმჯდომარის უფლებამოსილების შეწყვეტა

1. საბჭოს თავმჯდომარეს უფლებამოსილება შეუწყდება თუ:
 - ა) სასამართლოს მიერ აღიარებულია გარდაცვლილად ან გამოცხადებულია უგზო-უკვლოდ დაკარგულად;

- ბ) დაკარგა საქართველოს მოქალაქეობა;
- გ) აღარ არის რეგისტრირებული შესაბამისი მუნიციპალიტეტის ტერიტორიაზე;
- დ) მიმართა საბჭოს გადადგომის განცხადებით;
- ე) არასაკმარისი მიზეზით ზედიზედ 3 სხდომაში არ მიუღია მონაწილეობა;
- ვ) სასამართლოს ძალაში შესული განაჩენით მიესაჯა თავისუფლების აღკვეთა.
- ზ) გარდაიცვალა;

მუხლი 7. საბჭოს წევრი

1. საბჭოს წევრი უფლებამოსილია:

- ა) მონაწილეობა მიიღოს საბჭოს სხდომებში, მოახდინოს საკითხის ინიცირება, მონაწილეობა მიიღოს დებატებში, დასვას შეკითხვები მომხსენებელთან და თანამომხსენებელთან, გააკეთოს განმარტება, განცხადება ან/და მიმართვა;
 - ბ) შევიდეს და გადაადგილდეს ადგილობრივი თვითმმართველობის ორგანოს ადმინისტრაციულ შენობაში ამ ორგანოს მოსამსახურეთათვის დაწესებული რეჟიმის (სპეციალურის გარდა) შესაბამისად;
 - ბ) დაესწროს და წინასწარი წერილობითი მიმართვის გარეშე მონაწილეობა მიიღოს მუნიციპალიტეტის გამგეობის და მათ დაქვემდებარებაში მყოფი სამსახურების სხდომებში. მონაწილეობა მიიღოს დებატებში, დასვას შეკითხვები მომხსენებელთან და თანამომხსენებელთან, გააკეთოს განმარტება, განცხადება ან/და მიმართვა;
 - გ) შეხვდეს მუნიციპალიტეტის თანამდებობის პირებს, გამოითხოვოს და მიიღოს საჭირო ინფორმაცია საბჭოს უფლებამოსილებასთან დაკავშირებულ საკითხებზე;
 - დ) საბჭოს და მუნიციპალიტეტის გამგებელს წერილობით წარუდგინოს თავისი შენიშვნები და მოსაზრებები;
 - ე) ისარგებლოს ამ დებულებით დადგენილი სხვა უფლებამოსილებებით.
2. საბჭოს წევრის გამოწვევა დაუშვებელია;
3. საბჭოს წევრის საქმიანობა არ ანაზღაურდება.

მუხლი 8. საბჭოს წევრის უფლებამოსილების შეწყვეტა

1. საბჭოს წევრს უფლებამოსილება შეუწყდება თუ:

- ა) სასამართლოს მიერ აღიარებულია გარდაცვლილად ან გამოცხადებულია უგზო-უკვლოდ დაკარგულად;
- ბ) დაკარგა საქართველოს მოქალაქეობა;
- გ) აღარ არის რეგისტრირებული შესაბამისი თვითმმართველი ერთეულის ტერიტორიაზე;
- დ) მიმართა საბჭოს წევრობის შეწყვეტის განცხადებით;

- ე) არასაპატიო მიზეზით ზედიზედ 3 სხდომაში არ მიუღია მონაწილეობა;
- ვ) სასამართლოს ძალაში შესული განაჩენით მიესაჯა თავისუფლების აღკვეთა.
- ზ) გარდაიცვალა;

თავი მესამე
საბჭოს უფლებამოსილებები და დაკომპლექტების წესი

მუხლი 9. საბჭოს უფლებამოსილებები

1. სამოქალაქო მრჩეველთა საბჭო უფლებამოსილია:

- ა) წინასწარ განიხილოს მუნიციპალიტეტის გამგებლის სამუშაო გეგმა და პროექტები, გამოთქვას მოსაზრებები და შეიმუშავოს რეკომენდაციები განხილულ პროექტებთან დაკავშირებით;
- ბ) მოითხოვოს საბჭოსა და მუნიციპალიტეტის გამგეობის ერთობლივი სხდომის ჩატარება სპეციალური დღის წესრიგით;
- გ) მოამზადოს, განიხილოს და მუნიციპალიტეტის გამგებელს წარუდგინოს წინადადებები მუნიციპალიტეტში არსებული პრობლემების და მათი მოგვარების შესაძლო გზების შესახებ;
- დ) მუნიციპალიტეტის უფლებამოსილებას მიკუთვნებულ საკითხებზე მოაწყოს დისკუსიები და საზოგადოებრივი განხილვები;
- ე) მონაწილეობა მიიღოს მუნიციპალიტეტის მოსახლეობის გამოკითხვების და საზოგადოებრივი განხილვების ჩატარების ორგანიზებაში;
- ვ) მოისმინოს მუნიციპალიტეტის თანამდებობის პირების ანგარიშები;
- ზ) განახორციელოს საბჭოს დებულებით დადგენილი სხვა უფლებამოსილებები;

2. სამოქალაქო მრჩეველთა საბჭოს მიერ გამოთქმული მოსაზრებები და შემუშავებული წინადადებები მხოლოდ სარეკომენდაციო ხასიათისაა და მას სავალდებულო ძალა არ აქვს.

მუხლი 10. საბჭოს დაკომპლექტების წესი

- 1. საბჭო შედგება არანაკლებ 10 წევრისგან. წევრთა რაოდენობაზე გადაწყვეტილებას იღებს მუნიციპალიტეტის გამგებელი;
- 2. საბჭოს წევრთა ნახევარს შეადგენს, როგორც წესი, მუნიციპალიტეტის ტერიტორიაზე რეგისტრირებული მოქალაქეები, ხოლო ნახევარს ორგანიზაციული ნიშნით წარდგენილი პირები;
- 3. საბჭოს წევრობის კანდიდატის წარდგენის უფლება აქვთ:
 - ა) მუნიციპალიტეტის ტერიტორიაზე რეგისტრირებულ მოქალაქეთა საინიციატივო ჯგუფს (არანაკლებ 10 კაცის შემადგენლობით);

- ბ) მუნიციპალიტეტის ტერიტორიაზე რეგისტრირებულ მეწარმე სუბიექტს და არასამეწარმეო არაკომერციული იურიდიული პირს;
4. საბჭოს დაკომპლექტების შესახებ მუნიციპალიტეტის გამგებლის ბრძანება ქვეყნდება საჯაროდ როგორც ელექტრონულად (ვებ-გვერდის მეშვეობით), ასევე წერილობითი ფორმით გამგობის შენობაში სპეციალურ სტენდზე განთავსებით, საბჭოს დაკომპლექტებამდე 1 თვით ადრე;
5. საბჭოს წევრობის კანდიდატის წარდგენის მსურველებს უფლება აქვთ მუნიციპალიტეტის გამგებელს საზოგადოებრივი საბჭოს წევრად რეგისტრაციის შესახებ განცხადებით მიმართონ საბჭოს დაკომპლექტების შესახებ ბრძანების გამოქვეყნებიდან საბჭოს დაკომპლექტების შესახებ გადაწყვეტილების მიღებამდე ნებისმიერ დროს;
6. მუნიციპალიტეტის გამგებელი საბჭოს დაკომპლექტების შესახებ გადაწყვეტილებას იღებს განაცხადების მიღების დასრულებიდან 10 სამუშაო დღის ვადაში.
7. მუნიციპალიტეტის გამგებელი საბჭოს აკომპლექტებს თავისი დისკრეციული უფლებამოსილებიდან გამომდინარე.

თავი მეოთხე

საბჭოს სხდომა და გადაწყვეტილების მიღება

მუხლი 11. საბჭოს სხდომის მოწვევის უფლების მქონე სუბიექტები:

1. საბჭოს სხდომის მოწვევის ინიცირების უფლება აქვთ:
 - ა) მუნიციპალიტეტის გამგებელს საკუთარი ინიციატივით;
 - ბ) საბჭოს თავმჯდომარეს;
 - გ) საბჭოს წევრთა არანაკლებ 1/3-ს.

მუხლი 12. პირველი (სადამფუძნებლო) საბჭოს სხდომის მოწვევა

1. საბჭოს პირველ სხდომას დაკომპლექტებიდან 3 დღის ვადაში იწვევს მუნიციპალიტეტის გამგებელი.
2. პირველი (სადამფუძნებლო) საბჭოს სხდომა მოიწვევა იმავე წესით რაც ამ დებულებით დადგენილია რეგულარული საბჭოს სხდომის მოწვევისთვის.

მუხლი 13. საბჭოს სხდომის მოწვევა

1. საბჭოს სხდომა იმართება 3 თვეში ერთხელ მაინც. საბჭოს რიგგარეშე სხდომის მოწვევა შეუძლია მუნიციპალიტეტის გამგებელს, საბჭოს თავმჯდომარეს და საბჭოს წევრთა არანაკლებ 1/3-ს;
2. რიგგარეშე სხდომის მოწვევის ინიციატივა რეგისტრირდება გამგობის ადმინისტრაციულ სამსახურში და სხდომა იმართება რეგისტრაციიდან ერთი კვირის ვადაში;
3. საბჭოს სხდომების გამართვის ორგანიზაციულ-ტექნიკურ მხარდაჭერას უზრუნველყოფს მუნიციპალიტეტის გამგობის ადმინისტრაციული სამსახური .

მუხლი 14. საბჭოს მიერ გადაწყვეტილების მიღება

1. სხდომას წარმართავს საბჭოს თავმჯდომარე ხოლო მისი არ ყოფნის შემთხვევაში მისი დავალებით საბჭოს ერთ-ერთი წევრი;
2. საკითხის ინიცირების უფლება აქვს საბჭოს წევრს, საბჭოს თავმჯდომარეს და მუნიციპალიტეტის გამგებელს.
3. მუნიციპალიტეტის გამგებელი ან მათი წარმომადგენელი უფლებამოსილია დაესწროს სხდომას სათათბირო ხმის უფლებით;
4. საბჭო უფლებამოსილია თუ მის სხდომას ესწრება წევრთა ნახევარზე მეტი.
5. საბჭო გადაწყვეტილებებს იღებს დამსწრეთა უბრალო უმრავლესობით;
6. საბჭოს გადაწყვეტილება ფორმდება საბჭოს სხდომის ოქმით.

მუხლი 15. მუნიციპალიტეტის გამგებლის ვალდებულებები საბჭოსთან მიმართებით

1. მუნიციპალიტეტის გამგებელი ვალდებულია:
 - ა) საბჭოს განსახილველად წარუდგინოს მუნიციპალიტეტის ბიუჯეტის პროექტი საკრებულოსთვის წარდგენამდე;
 - ბ) საბჭოზე განსახილველად წარადგინოს მუნიციპალიტეტის სივრცითი დაგეგმარების დოკუმენტები, მუნიციპალიტეტის გეოგრაფიული ობიექტების სახელდების შესახებ წინადადებები;
 - გ) საბჭოსთან ერთად განიხილოს სხვა მნიშვნელოვანი ადმინისტრაციულ-სამართლებრივი აქტების პროექტები;
 - დ) საბჭოსთან ერთად განიხილოს მუნიციპალიტეტის ინფრასტრუქტურული და სოციალური პროექტები;
 - ე) წელიწადში ერთხელ საქმიანობის სრული ანგარიშით წარსდგეს საბჭოს წინაშე.

თავი მეხუთე

დასკვნითი დებულებები

მუხლი 16. დასკვნითი დებულებები

1. საბჭო იქმნება მუნიციპალიტეტის გამგებელს უფლებამოსილების ვადით.
2. წინამდებარე დებულებაში ცვლილებებისა და დამატებების შეტანა ან მისი გაუქმება ხდება მუნიციპალიტეტის გამგებლის ბრძანების საფუძველზე.